


Edificio Weststraat 15, otro edificio monumental su portanan ta habri mañan pa publico



ORANJESTAD(AAN)-- Durante di e Paseo, Edificio Weststraat 15, situa riba Weststraat den Oranjestad, tambe ta habri su portanan for di 10'or di mainta riba diadomingo 14 di september venidero. Informacion di Weststraat # 15: Un cas di cunucu construi na 1908, e tempo ey den e contexto urbano, situa na e huki noordwest di e crusada di Caya Betico Croes y Waterweg. Na e banda di Caya Betico Croes (e tempo aya y te awe) tin riba e porta robes un indicacion den e muraya: '1908, no.97'. E cas tabata den su forma original orienta casi oost-west. Na 1999-2000 ainda e cas tabata na su luga original. Na comienso di siglo 21 a habri pa e cas di cunucu aki tambe un periodo nobo. Nan a traslad'e pa Weststraat.

Nan a hinca parti (manera e entrada y kapellen) den caha y a traslada nan completamente, mientras cu nan a desarma y plama otro parti for di otro y/of nan a reemplasa nan. E interes grandi di e cas di cunucu den esun anteriormente yama Nassastraat, tabata e recuerdo di e imagen historico di e caya. Na momento cu a traslada e cas, e tabata forma parti caba di e registro. A ser delibera riba e posibilidad pa e mantene e status monumental. Despues di amplio deliberacion, a cay un decision positivo. Naturalmente e balor importante di e situacion a bay perdi. Awendia e partinan cu den e contexto historico di arkitektura ainda bo por indica, ta protegi. Cu tur probabilidad e nucleo di e cas aki a keda construi na 1860 door di un Frances. Na 1908 señor Richard Johannes Eman van der Biest, kende ta wata casa cu Johanna Catharina van der Biest-Oduber, a cumpra e cas aki. E ultimo aki tabata yiu muhe di Señor Jan van der Biest-Croes, ex-director di e mina di oro na Aruba.

Seis mucha a lanta den e cas precioso y unico aki. Frederica van der Biest-Eman, un di e seis yiunan di Richard Eman, a casa cu su primo John Gerard Eman, e fundador di e prome instancia financiero na Aruba, esta Aruba Bank N.V. E cas aki ta hopi balioso pa e pais Aruba como cu e tin cuater bentana den e dak (dak-kapellen). A muda e edificio den luna di augustus 2000 for di Caya Betico Croes pa Weststraat sin number y des-

pues di un restauracion el a keda entrega na november 2001. E proyecto a wordo realisa door di Albo Aruba N.V. conhuntamente cu Monumentenbureau.

Stichting Monumentenfonds Aruba ta propietario di e edificio y hunto cu su team di su oficina lo duna e recoridonan na Weststraat # 15, durante di e Paseo Monumental IV 2014. Actualmente ARINA ta ubica den e edificio monumental aki.

Ministerio di Cultura, Oficina

di Monumento y Comision Paseo Monumental ta invita henter e pueblo di Aruba y amantenan di monumento pa haci uzo di e oportunidad aki pa participa na e paseo monumental di e aña aki y ban apoya, duna balor na nos cultura y nos herencia cultural y cera conoci cu e tecnica den arkitektura cu a ser uza den nos monumentonan. Warda e articulo aki y sigur por uza esaki como fuente durante Paseo Monumental IV 2014.